



«ISHONCH» ИШОНЧИНГИЗНИ ОҚЛАЯПТИМИ?

«Ishonch» va
«Ishonch-Доверие»
газеталари
тахририяти
вакиллари
жойларда
ўтказилаётган
«Ishonch»
кунларида
газетхонларга
шу савол билан
юзланмоқдалар.

>>>4-саҳифада
ўқинг

Сирожиддин САЙИД,
Ўзбекистон халқ шоири

ВАТАН БАҒРИДА БЎЛ БЕДОР

Ватан бағрида бўл бедор,
Ватан ҳеч қайга кетган йўк,
Ғаму дардига бўл даркор,
Ватан ҳеч қайга кетган йўк.

Валилар гар Ватан дерлар,
сафар андар Ватан дерлар,
Ватан ичра ватанлар бор,
Ватан ҳеч қайга кетган йўк.

Жаҳонда мулку давлат кўп,
мусофир халку миллат кўп,
Келиб кетгучилар бисёр,
Ватан ҳеч қайга кетган йўк.

Бу кенг оламда сайёҳлар
кезар – тенг ярми гумроҳлар,
Улардан тинглар истиғфор,
Ватан ҳеч қайга кетган йўк.

Шу тупроқ – Ер юзи янглиғ,
Бухорий, Термизий янглиғ,
Сенга номус эрур ҳам ор,
Ватан ҳеч қайга кетган йўк.

Ватан – Бобораҳим Машраб,
ҳамон сўз айтадир қақшаб,
Агар бўйнидадир минг дор –
Ватан ҳеч қайга кетган йўк.

Ёниб шому саҳарларда,
олов бўлгил шафақлардай,
Ялов бўл ҳам яловбардор,
Ватан ҳеч қайга кетган йўк.

Уни мангу ва бетакрор
яратмиш Қодир Қаҳҳор,
Гувоҳдир гумбази даввор,
Ватан ҳеч қайга кетган йўк.

Бу алвон лола майдони –
қўмилган Жиззах исёни,
Шаҳидлар қонидан гулзор –
Ватан ҳеч қайга кетган йўк.

Тўлаб Чўлпонлари ўлпон,
ётибдир шоиру чўпон,
Юрак бағри жароҳатзор,
Ватан ҳеч қайга кетган йўк.

Келиб кўр боғу айвонин,
Адибларнинг хиёбонин,
Адаб ҳам ёдига ёдгор –
Ватан ҳеч қайга кетган йўк.

Қолиб – кетгучилар бисёр,
нолиб кетгучилар бисёр,
Улардан бўлмагил зинҳор,
Ватан ҳеч қайга кетган йўк.

Учар гар қошу мижгонинг –
кутар тандирдаги нонинг,
Онагдай мушфику хоксор,
Ватан ҳеч қайга кетган йўк.

Бу оламда ягонангдир,
отанг ётган сагонангдир –
Хасу хориди минг асрор,
Ватан ҳеч қайга кетган йўк.

Уни кимлар ҳавас этмас,
унга чексиз нафас этмас,
Буюк изҳору ҳам иқрор,
Ватан ҳеч қайга кетган йўк.

Яралмиш шавкату шондан,
матонат бирла иймондан,
Ватан севганга толе ёр,
Ватан ҳеч қайга кетган йўк.

Фалак ўпган иморатлар,
дилу жондан иборатлар,
Ватан пайдодир пайдор,
Ватан ҳеч қайга кетган йўк.

Хатарнок айланур олам,
бу нолам сенга, жон болам,
Сен огоҳ бўлу ҳам хушёр,
Ватан ҳеч қайга кетган йўк.

Сенга ҳар ғишти таълимдир,
Ватан – тенгсиз муаллимдир,
Зиёкор бўлу даъваткор –
Ватан ҳеч қайга кетган йўк.

Сен унга обу оташ бўл,
навобахшу давобахш бўл,
Жафокаш бўлу хизматкор –
Ватан ҳеч қайга кетган йўк.

30.09.2024 й.

Ўзбекистон
касаба
уюшмалари
Федерациясида
куну тун
фаолият
кўрсатадиган
қисқа
рақамли
1211
«Ишонч телефони»,
яъни
«Call-center»га
мамлакатимизнинг
турли ҳудудларида,
олис ва чекка
қишлоқларида
яшайётган
хотин-қизлар
ўз муаммолари
бўйича исталган
вақтда мурожаат
қилишлари
мумкин.

◆ Касаба уюшмаси аралашгач...

ХОДИМЛАР ҲУҚУҚИ ҲИМОЯ ҚИЛИНДИ

Янгийўл шаҳар тиббиёт бирлашмасида Соғлиқни сақлаш ходимлари касаба уюшмаси Тошкент вилояти кенгаши инспекторлари томонидан ўрганиш ўтказилди. Шу жараёнда муассасада ходимларнинг меҳнат шароитлари билан боғлиқ қонунбузилишга йўл қўйилгани аниқланди.

Маълум бўлишича, бирлашмадаги 44 та иш ўрнининг меҳнат шароитлари ва асбоб-ускуналарнинг жароҳатлаш хавфлиги юзасидан шаходат (баҳолаш)дан ўтказиш ишлари амалга оширилмаган. Натижада 535 нафар ходимнинг ҳуқуқлари бузилган. Шунингдек, бирлашмада меҳнат қилаётган жами 174 нафар тиббиёт ҳамда техник ходимлар шахсий ҳимоя воситалари билан таъминланмаган.

Дархол иш берувчига ушбу камчиликларни бартараф қилиш бўйича ёзма кўрсатма хати йўлланди. Бирок кўрсатма хатидаги талаблар бажарилмади. Шундан сўнг фуқаролик ишлари бўйича судга даъво аризаси киритилди.

Суд бирлашмада ноқулай меҳнат шароити ва зарарли омиллар билан ишловчи касб-лавозимлардаги ходимларнинг иш ўринларининг меҳнат шароитлари ва асбоб-ускуналарнинг жароҳатлаш хавфлиги юзасидан аттестациядан ўтказиш, тиббиёт ва техник ходимларни шахсий ҳимоя воситалари билан таъминлаш бўйича мажбурият юклаш юзасидан ҳал қилув қарори чиқарди.

Жўрабек ИСЛОМБЕКОВ,
Соғлиқни сақлаш ходимлари
касаба уюшмаси Республика кенгашининг
Тошкент вилояти бўйича меҳнат техник инспектори



ТўЛАНМАГАН ИШ ҲАҚЛАРИ УНДИРИБ БЕРИЛДИ

Ўзбекистон Республикаси Конституциясининг 37-моддасида ҳар бир шахс меҳнат қилиш, эркин касб танлаш, адолатли меҳнат шароитларида ишлаш ва қонунда кўрсатилган тартибда ишсизликдан ҳимояланиш ҳуқуқига эга эканлиги мустақамлаб қўйилган.

Бирок айрим иш берувчилар ишчи-ҳодимларнинг иш ҳақларини ўз вақтида бермаслиги оқибатида уларнинг ҳуқуқлари бузилмоқда.

Рағбат йўқ жойда эса ходимлар ишдан моддий ва маънавий қониқиш ҳосил қилмайди. Натижада уларнинг фойдали иш коэффициенти тушиб кетади. Энг ачинарлиси, ўз вақтида тўланмаган иш ҳақи кадрлар кўнимсизлигига олиб келади.

Бу каби ҳолатларнинг олдини олиш учун тиббиёт муассасаларида ҳам иш-режага

асосан Меҳнат қонунчилигига риоя этилиши юзасидан ўрганиш олиб бориляпти. Жумладан, Учқудуқ тумани тиббиёт бирлашмасида белгиланган тартибда иш ҳақларининг тўғри тўланиши юзасидан жамоатчилик назорати ўтказилди.

Ўрганиш давомида бир қатор ходимларга иш ҳақи кам тўлаб келинаётганлиги аниқланди. Бу борада тегишли ҳужжатлар тўпланиб, тўланмасдан қолingan иш ҳақларини ундириш бўйича Фуқаролик ишлари бўйича Учқудуқ туманлараро судига даъво аризаси киритилди.

Натижада суднинг тегишли қарорига

асосан Учқудуқ тумани тиббиёт бирлашмаси бошлиғи Х.Шукуровга 197 239 329 сўм, даволаш ишлари бўйича ўринбосар З.Қўзиевга 126 757 278 сўм, бош хамширалар М.Авезовага 66 122 632 сўм, Н.Хотамовага 10 213 134 сўм тўланмасдан қолingan иш ҳақлари ундириб берилишига эришилди.

Завриддин ҲАЛИМОВ,
Соғлиқни сақлаш ходимлари касаба уюшмаси Республика кенгашининг
Навоий вилояти бўйича меҳнат ҳуқуқ инспектори

